

Evelyn Wever-Croes (MEP)

Cambionan den Green Corridor ta cuestionabel

ORANJESTAD – Lider di MEP Evelyn Wever-Croes den conferencia di prensa a splica dicon awor atrobe ta discutiendo riba Green Corridor, siendo cu ya 3 aña pasa e mayoria di AVP den Parlamento a duna e Minister e autorisacion pa sigui cu e proyecto. Tur cos a cuminsa cu un carta cu Minister Sievinger a manda Parlamento dia 10 di juni ultimo. Riba su mes e contenido di e carta tin hopi cos contra ley y cues-

tionabel unda cu ta pidiendo sumanan adicional pe proyecto, sin kier specifica cuanto. Den e carta e minister ta informa cu lo bay gasta mas di loke Parlamento a aproba na 2011.

E ley cu a pasa na 2011 a laga solamente espacio si en caso prijsnan subi pero no pa sumanan extra. Ta straño cu awor minister kier duna e ley un interpretacion diferente, pero no kier cambia e ley. Remarcabel ta cu e kier

haci esaki sin bin Parlamento y aparentemente e lo kier djis firma. Mas y mas no ta haya informacion cu tin cosnan straño ta pasando relaciona cu e proyecto aki, y mi kier avisa tur hende cu coopera pa firma sin cu Parlamento trata esaki, cu nan ta cometiendo un acto ilegal.

Loke ta straño ta cu awor tin un grupo involvi cu no ta Odinsa mas pero diripiente e grupo Odinsa cu a bringa hopi tempo den Corte, a cambia y awor Gobierno ta deal

cu Caribbean Infrastructure Company. Tambe tin entendi cu ta e compania aki lo bay presta placa na Deutsche Bank. Akinan ta unda cosnan straño ta cuminsa y ta p'esey nos fraccion a pidi un reunion publico cu Minister Sievinger cual ta planea pa tuma luga 29 juni 2015. Pa motibo cu Minister Sievinger no ta na Aruba, presidente parlamento a informa Minister Sievinger cu e lo no bay firma nada tanten cu Parlamento bay trata esaki.

Ta tempo pa Aruba para keto y pensa si e proyecto aki ta necesario si of no, specialmente en bista di e Mega Debe di

nos pais, y tur e medidanan cu tin nos dilanti. Berdad e idea di e Green Corridor cu mata planta banda di caminda por ta bunita, y e ta un alivio pa esunnan cu ta frecuente e ruta, cu bo por yega bo destino 5 minuut mas trempa, pero mester pone esaki den balansa. Awor cu e gobierno aki a cera e refineria, e situacion financiero di nos pais ta hopi critico. No ta husto pa pone nos yiunan y nan yiunan paga pa un proyecto asina grandi awor. Podise pa ora e situacion financiero di nos pais ta miho, segun lider di MEP Evelyn Wever-Croes. □